

Kalata gwa kwanda ugwa Peeteli Isyakulongosya

Peeteli, aali ntumigwa gwa Jesu Kilisiti, aabasimbiile kalata ujū aBakilisiti aba baali nkiisu iki mmasiku aga bikuti Butuluki. Aasimbile kalata ujū ukubakasya, paapo baakubilwaga kunongwa jaa kija Bakilisiti. Ikubakumbusya ukuti Jesu Kilisiti aakubiilwe, kangi aataamiigwe fiijo mbuumi bwake ubwa pakisu, po aBakilisiti boope bikutaamigwaga. Na paapo bikukaba ingubilo nyingi, poope ingubilo isyo aasikubapa amaka. Kyala ikubasajaga mu ngubilo isyo. Peeteli ikubakasya aBakilisiti ukwendelela ukuja na kajiilo akaa bandu baa Kyala.

Isi silimo mwa kalata ujū
Peeteli ikubaponia abiitiki
Ikugwa ulupi kwa Kyala ku bupoki bwabo
Ikubakasya ukuja biikemo paapo basunguliigwe ukuja bano
Muno bikulondeligwa ukubabombela abalongosi, ni sya ku
Ukukubilwa kunongwa jaa kunkonga Kilisiti
Ukukitiima ikipanga kya Kyala

Uluponio

¹ Kalata ujū afumile kumyangu une Peeteli, ne ntumigwa* gwa Jesu Kilisiti. Ngubasimbila

* **1:1** 1:1 Untumigwa Bala iisya Abatumigwa ku Isyakulingaania.

umwe mwe muli basunguligwa baa Kyala, kangi mukutuugala bo ulwa baheesya mfiisu ifya mu Ponti, Galatija, Kapatokija, Asija na mu Bitinija. ² Umwe musunguliigwe bo muno Taata Kyala aabingiliile ukufuma bo ikupela ikiisu, ukuti mwelusigwe na Mbepo Mwikemo nu kuntiila Jesu Kilisiti, ujua aabamiisiile iilopa lyake ili lyalyoniike kunongwa jinu. Kyala abongele iliipyana nu lutengaano ku bwingi.

Jesu atwele ulusubilo lwa buumi

³ Atuufigwege Kyala, uGwise ugwa Ntwa gwitu Jesu Kilisiti! Ku kibabilisi kyake ikikulamba aatapelile, ukuti tupaapigwe kangi ulwa bubili, ku njila jaa kunsyusa Jesu Kilisiti ukufuma mbafwe. Aabombile bo ulo ukuti tujege nu lusubilo ulunywamu, ⁴ nu kuti twambilile isajo isi Kyala ababiikiile kumwanya umwe mwe bandu baake. Isajo isyo aasitikonangika, aasitikubola pamo ukukulupa. ⁵ Isajo isyo syinu, mwe mukulindiligwa na maka agaa Kyala, ku njila jaa lwitiko lwinu mpaka bo mukabile ubupoki, ubu bukwisa kusetuligwa pi isiku ilya kummaliikisyo.

⁶ Pi isiku ilyo mukwisa kusekela, na paapo akabalilo aka mukulondigwa ukukaba ubutolwe kukabalilo, kunongwa jaa ngubilo isya lako nu lako, ⁷ isi sikulugela ulwitiko lwinu, ukuti lunangisye ukuja lwa bwanalooli. Ulwitiko lwinu lukafu ukukinda isahabu. Isahabu, bo ulwa lwitiko lwinu, jikukosigwa mmooto ukuti jije nunu, kangi jikasigwe. Leelo isahabu jikoonangika. Loope ulwitiko lwinu

aalukugeligwa nū mooto ukuti lukasigwe. Kunongwa jaa isyo aamukwambilila induufyo, ubasisya nū lwimiko bo Jesu Kilisiti ikuseteligwa pi isiku lila. ⁸ Umwene munnganile na paapo mukaali mukammbona, na ulu mukammwitika na paapo mukammbona. Mukwisa kusekela ulusekelo ulu mukabagila ukulingaania, ⁹ paapo aamukwambilila, kangi muli pakwambilila, ubupoki bwinu ubu jo nyango jaa lwitiko lwinu. ¹⁰ Inongwa isya bupoki bwinu ubo, abakunguluka baalyeneesiisye fiijo ukuti bamanye. Baakungulwike inongwa isya ipyana lya Kyala ili aabingiliile ukubapa umwe. ¹¹ Mbepo gwa Kilisiti jo ujū aali nkati mmyabo, aakungulukaga syope ingubilo sya Kilisiti, nū busisya ubu aabukukongaga. Abakunguluka bala baalondile fiijo, ukuti bamanye ko kabalilo kaliku akaa nongwa isyo. ¹² Kyala aabasetuliile abakunguluka bala, ukuti inongwa isi baakungulukaga sikaabatulaga abeene, looli umwe. Inongwa isyo syo isi mupiliike ku bandu aba baabalumbiliile iNdumi iNunu ku maka agaa Mbepo Mwikemo, ujū Kyala aalintumile ukufuma kumwanya. Abandumi boope bikanyonywa fiijo ukusimanya inongwa isyo.

Abiitiki bajege biikemo

¹³ Kunongwa ijo mwitendekesye mu ndumbula syinu, mujege maaso fiijo, kangi mubiike ulusubilo lwinu mwi ipyana ili aamukupeeligwa bo Jesu Kilisiti ikuseteligwa. ¹⁴ Mujege baana baa Kyala abaa lwijiisyo.

Mulingiitikaga kangi ukufikonga ifinyonyo fyinu ifibiibi ifi mwali nafyo bo mukaali ukubumanya ubwanalooli bwa Kyala. ¹⁵ Kunongwa ijo, bo ulu Kyala ujū abakooliile mwikemo, nuumwe mujege biikemo kuli syosa isi mukubomba, ¹⁶ paapo sisimbiigwe mwa Kalata uMwikemo ukuti, “Mujege biikemo paapo une ndi mwikemo.”† ¹⁷ Po mukunsuuma Taata ujū ikundonga kukuti mundu ukukongana ni mbombo syake, kisita kwegamila kumo. Kunongwa ijo muntiilege fiijo nkabalilo aka mukutugala pakiisu ulwa baheesya. ¹⁸ Namanga numeenye ukuti Kyala aabaabwile ukufuma nkajiilo kiinu akasita kubagisya, aka mwalyambiliile ukufuma ku biisukulu biinu. Akaabahombiile utundu utwa ntengo ugwa paasi, bo ifeesa pamo isahabu utu tukoonangika, ¹⁹ looli aabaabwile mbutulanongwa ku njila jaa ilopa ilya ntengo fiijo ilya Kilisiti, ujū aali bo akang’oosi‡ akanunu akasita kababye nakamo. ²⁰ Kilisiti ujo aabiikiigwe na Kyala ukukongana nu lubaatiko lwake bo ikiisu kikaali ukupeligwa, looli aaguuliile mpaka pakabalilo aka, akaa kummaliikisyo, po alinkuboneka kunongwa jinu. ²¹ Aaliisile ukuti abalongosye ukummwitika Kyala, ujū aalinsyusiisye Jesu nu kumpapo ubusisya, ukuti mummwitike nu kunsuubila Kyala.

Ukupaarigwa ulwa bubili

† **1:16** 1:16 Bala kalata gwa Abanyaleebi 11:44-45. ‡ **1:19** 1:19 Akang’oosi Bala iisya Kang’oosi ku Isyakulingania.

22 Paapo mukusikonga imanyisyo sya bwanalooli, mwelusiigwe ukuti mugananegwe kisita busyobi. Kunongwa ijo mugananegwe ni ndumbula joosa. 23 Mukulongdigwa mujege nu lugano ulu, paapo mupaapiigwe ulwa bubili, somma ku bapaapi aba bikufwa looli ku mpaapi ujau atikufwa, ku njila jaa isyu lya Kyala ili likujako bwila na bwila. 24 Kalata uMwikemo ikuti,

“Abandu boosa bo ulwa liisu,
nu banunu bwabo bali bo ubalenge ubwa
ndiisu.

hliisu nu balenge fikuma, fikugwa paasi,

25 looli iliisya lya Kyala likujako bwila na
bwila.”§

hliisya ilyo jo Ndumi iNunu iji mwalambililiigwe.

2

1 Kunongwa ijo, mubuleke ububiibi boosa, ubatungulu, ubusyobi, ubuafi nu kujobana ububiibi. 2-3 Akabalilo aka monjile, kangi mwandile ukumanya ukuti uNtwa nnunu.* Po bo ulwa baana abafyele aba buumiilwe amabeele agaa bannabo, munwege ulukama ulwa mwa Mbepo ulusita kongaania nafimo, ulu aalukubatula umwe ukukula nu kupokigwa.

Abiitiki basunguligwa baa Kyala

4 UNtwa Jesu lyo ibwe ilyami ilya kujengela. hliibwe ilyo abandu baalikanile, looli Kyala alisungwile, kangi lya ntengo nkyeni mmyake.†

§ 1:25 1:24-25 Bala kalata gwa Jeeseja 40:6-8. * 2:2-3 2:2-3 Bala kalata gwa Isabuli 34:8. † 2:4 2:4 Bala kalata gwa Matai 21:42.

Ɖɩa musegelele kwa Jesu, ⁵ po na nuumwe Kyala ikababombela ulwa mabwe amuumi ukujenga itempeli ijaa mwa Mbepo Mwikemo. Mu tempeli iyi, umwe kangi muli bapuuti abiikemo. Mukusoosya amakemo agaa mwa Mbepo aga gikunhobosya Kyala, ku maka agaa Jesu Kilisiti. ⁶ Po mwa Kalata umwikemo Kyala ikujoba ikuti, “Namukeete, uko nkaaja akaa mu Syoni, mbiikile iliibwe ilya lwalo, kangi ibwe ili ndisungwile, kangi lya ntengo. Umundu gwesa ujū ikummwitika ujū jo ibwe ilyo, atikwisa kusukamo siku.”‡

⁷ Iibwe ilyo lya ntengo kumyinu umwe mwe mukummwitika, looli kuli aba batikummitika, “Iiibwe ili abajenga nyumba baalikaanile, lya lijile ibwe ikulamba pa lwalo, pa nguto,”§

⁸ na, “Iiibwe ili abandu aabikwitikangapo, ili aalikubapelelaga abandu ukugwa.”* Aabikwitikaga paapo bakaaliitiike iisyu lya Kyala, mo muno baabaatikiliigwe na Kyala ukufuma kubwandilo bwa kupela ikiisu.

⁹ Looli umwe muli basunguligwa baa Kyala, umwe muli bapuuti baa kinyafyale, umwe muli kikolo ikiikemo, kokuti muli bandu baake juujo.† Mwasunguliigwe ukuti mufumusyeye induufyo sya Kyala, ujū aabakooliile ukuti musookemo

‡ 2:6 2:6 Bala kalata gwa Jeeseja 28:16. § 2:7 2:7 Bala kalata gwa Isabuli 118:22. * 2:8 2:8 Bala kalata gwa Jeeseja 8:14.

† 2:9 2:9 Bala kalata gwa Ukusooka 19:5-6.

mu ngiisi, ukuti mujege kumyake ndumuli lwake ulanunu. ¹⁰ Kubwandilo mukaali bandu baa Kyala, looli akabalilo aka muli bandu baake. Kangi mukaalyambiliile iipyana lya Kyala, looli akabalilo aka mulyambiliile.

Ukubimika abalongosi boosa

¹¹ Bakundwe, ngubapyelesya, paapo muli baheesya nkiisu muno kangi mukukinda, mufileke ifinyonyo fyinu ifya tundu utwa pakiisu, ifi fikulwa ubwite na nuumwe. ¹² Mujege na kajiilo akanunu pakati pa bandu abapanja, aba mukutuugala nabo. Po nalinga bikubajoba ukuti mukubomba kabiibi, basibonege imbombo syinu inunu, abandu aabikuntuufyaga Kyala kunongwa jinu pi isiku lya bulongi bwake.

¹³ Mwijiisyege ku balongosi boosa, paapo muli bandu baa Ntwa Jesu. Mummwimikege amalafyale gwa kiisu, paapo umwene jo ndamuli unkulumba ugwa bandu boosa.

¹⁴ Kangi mubimikege abalongosi baa fiisu, paapo amalafyale abasalile ukubafunda abandu aba bikutula inongwa, nu kubatuufya aba bikubomba inunu. ¹⁵ Po Kyala ikulonda mubombege inunu, ukuti abakonyofu aba bakasyagania kanunu, balingajaga nalyo nalimo ilya kubajoba ububiibi umwe.

¹⁶ Umwe muli baabuke, leelo mulingabombelaga ubwabuke bwinu ukubomba imbiibi, looli mutuuugalege bo muno ababombeli baa Kyala bikulondeligwa ukutuugala.

¹⁷ Mubimikege abandu boosa nu kubagana

abiiitiki biiniinu. Muntiilege Kyala nū kummwimika umalafyale.

Ukwikasya mu ngubilo

¹⁸ Linga ugwe ūli ntumwa gwa nkabi pakiisu apa,‡ gwijiisyege kumyake, kangi ummwimikege. Kukaja kokuti umwene nnunu kangi mooloolo itolo, looli nalinga umwene nkali. ¹⁹ Linga kuumiilila ukutaamigwa, ku nongwa jaa kunngana Kyala, kisita kutula inongwa, kusajigwa. ²⁰ Linga kubomba kabiibi kangi kuumiilila mu ngubilo isya kukufunda ku babiibi, bule kwinogona ukuti kwambilila induufyo? Looli linga kuumiilila ukutaamigwa paapo ubombile inunu, po Kyala ikukusaja.

²¹ Mukooleliigwe ukuti muumiililege bo ūlo paapo Kilisiti juujo aalyumiiliile ukutaamigwa kunongwa jinu. Umwene gwa kukeetelamo, ukuti mwendege mu njila jilajila bo iji aalyendile umwene.

²² “Umwene akaatulile inongwa, pamo ukujoba ubutunguū bumo nkanwa mmyake.”§

²³ Bo bikuntuka akaagomwisye iisyu nalimo ilya kuheelula. Bo bikuntaamya akaagelilepo ukubagomokesya lyolyosa ilya kubatiilisya. Looli syosa aalinndekiile Kyala ūju ikubalanga abandū ku bwanalooli. ²⁴ Kilisiti juujo aapimbile ubutulonongwa bwitu mu mbili gwake pa kikohekano, ukuti uswe tugoge ifinyonyo

‡ **2:18** 2:18 Umtumwa gwa nkabi pakiisu apa Bala iisyu Umtumwa ku Isyakulingaania. § **2:22** 2:22 Bala kalata gwa Jeesa 53:9.

fyitu ifi fikutupela ukubomba ubutulanongwa, looli tukabe ubumi ubwa kunkyela Kyala. Umwene aakabile ififulalo ukuti umwe mupone. ²⁵ Mwasobile bo ulwa ng'oosi isi sisobile injila, looli lilino munngomokiile uNtwa Jesu, uNtiimi gwinu ujũ ikubalindilila.

3

Imanyisyo sya kajilo akanunu ku bandu abeegi

¹⁻² Mwe bakiikulu, mwijiisyege ku balume biinu. Ku njila ijo, nalinga abalume biinu batikulikonga iisya lya Kyala, bikutenganaga ku kajilo kiinu akaa lwimiko na lwijiisyo. Po abalume biinu aabikufikilapo ukummwitika Kyala, kisita umwe ukubabulapo iisya nalimo. ³ Ubununu bwinu bulingajaga bwa munyuma, bo ukuluka inywili, ukufwala ishabu pamo imyenda igya lwimiko, ⁴ looli ubununu bwinu bufumege nkati. Ubununu ubu bwa ndumbula ijaa booloolo na iji jitengeene. Kangi butikoonangika pamo ukukulapa. Ubununu ubo bwa ntengo nkyeni mwa Kyala. ⁵ Ijolo abakiikulu abiikemo aba bansubilaga Kyala, biinosyaga bo ulo ku njila jaa kajilo akanunu, akaa kwijiisya ku balume baabo. ⁶ Unkiikulu jumo ujũ aabombile bo ulu jo Sala unkasi gwa Abulahamu, ujũ iijiisyaaga ku ndume antigi, "Ntwa gwangu."* Umwe muli baanaake. Kunongwa ijo mwendelelege ukubomba inunu, nalinga bikubatiilisa.

* **3:6** 3:6 Bala kalata gwa Ubwandilo 18:12.

7 Na nuumwe mwe banyambala mwe beegi, mukulondigwa ukuti mutugalege kanunu na bakasi biinu, paapo mumeenye ukuti bakaja na maka bo agiinu. Kangi mubakeetege ku lwimiko, paapo Kyala abapeele umwe mwesa ubumi bwa bwila na bwila. Po leelo mubombege bo ulo ukuti inyiipuuto syinu silingasiligwaga.

Ukutaamigwa kunongwa jaa kubomba inunu

8 Isya kamaliikisya, mujege ni ndumbula jimojeene, mwinogonege limolyene, kangi mutulanene. Mugananege paapo muli bukamu ndwitiko, mujege booloolo kangi mwijiisyege. 9 Mulingagomokesyaga ububiibi ku mundu ujū ababombiile kabiibi. Abandu bo bikubatuka, mulingagomokesyaga amaheelu, looli mubasajege. Paapo Kyala aabakooliile ukubomba bo ulo, ukuti mukabe isajo syake.

10 Isi sili bo ulu Kalata uMwikemo ikuti,
“Gwesa ujū ikulonda ukutugala kanunu nu
kūja ni sajo,

aleke ukubaheeha abandu nu kutungulupa.

11 Aleke ukubomba imbiibi, looli abombege
inunu.

Alusuubilege ulutengaano nu kulukonga fi-
ijo.

12 Namanga Kyala ikubakeeta abandu abagolofu
ku kibabiilisi,

kangi ikwambilila inyiipuuto syabo.

Looli aba bikubomba ubutulanongwa,
ikubasinda iikosi.”†

† 3:12 3:10-12 Bala kalata gwa Isabuli 34:12-16.

13 Linga mukwija ula ukubomba inunu, jo jwani abagiile ukubabombela kabiibi?
 14 Looli nalinga mukutaamigwa kunongwa jaa kubomba isya bugolofu, Kyala ikubasaja. Po leelo mulingatiilaga bo bikubatiilisa, kangi mulingapaasyaga.‡ 15 Looli mummwimikege Kilisiti ukaja Ntwa mu ndumbula syinu. Mwitendekesyege akabalilo koosa ukummwamula gwesa uja ikulaalusya isya lusubilo lwinu. Looli mubombege bo uo ku booloolo nu lwimiko, 16 ni ndumbula inyeelu. Po aba bikutungulupa kunongwa jaa mbombo inunu isi mukumbombela Kilisiti, sibakolege isoni. 17 Kununu ukukindapo ukutaamigwa kunongwa jaa kubomba inunu, linga bo bwigane bwa Kyala, kuliko ukupeeligwa ingubilo na Kyala kunongwa jaa kubomba imbiibi.

18 Joope Kilisiti aakubiilwe nu kufwa kamo-keene itolo, kunongwa jaa butulanongwa bwa bandu. Na paapo umwene ngolofu, aabafwiliile mwe batulanongwa ukuti abafwanie na Kyala. Aagogiigwe bo ali nu mbili, leelo aasyukile ku maka agaa Mbepo Mwikemo. 19 Ku maka ago aasilumbiliile syope ni mbepo inyali, isi syapinyi-igwe mu nnyololo. 20 Ijolo imbepo inyali isyo syakaanile ukuntiila Kyala, bo Nwaka ikujenga ingalaba. Kyala aabakeeteliile imbiibi syabo mpaka akabalilo aka ingalaba jaatendekesiigwe. Looli kummaliikisyo abanduu banandi, kokuti abanduu lwele itolo, bo aba Kyala aabapok-ile. Nalooli baapokiigwe ku njila jaa miisi.

‡ 3:14 3:14 Bala kalata gwa Jeesa 8:12.

21 Na nuumwe mupokiigwe akabalilo aka ku njila jaa miisi, kokuti amiisi agaa loosyo lwinu. Kunongwa ijo, ulosyo kukaja ko kusoosya imbiibi kwene, looli ko kunkonga Kyala ni ndumbula inyeelu. Ulosyo ulo lukubapoka ku njila jaa kusyuka Jesu Kilisiti. 22 Kilisiti ujo alinkubuka kumwanya, kukibafu ikiiliilo kya Kyala, pabujo ubusisya fiijo. Ikubalagila abandumi, pamopeene ni fipeligwa ifingi fyosa, ifi fili nu bulagili na maka.

4

Akajiilo aka kikunkyela Kyala

1 Nuumwe mwitendekesyeye ukukubilwa bo Kilisiti, paapo umwene aakubillwe umbili gwake. Ngujoba bo ulo paapo Jesu, ku njila jaa kukubilwa kwake, aabutolile abutulanongwa ubwa bandu. 2 Po mbuami bwinu mutikulongosigwaga ni finyonyo fya mbili, looli mukutugalaga bo muno iiganiile Kyala. 3 Ijolo mwaliisibiile ukukonga akajiilo akaa bandu aba bakammanya Kyala. Akabalilo ako kamaliike. Kangi mwaliisibiile ukulogwa bo abeene nu kulagiligwa ni finyonyo fyinu, mwagaalaga, mwabiikaga ulusekelo lwa kulya ifindu ku bupafu. Kangi mwipuutaga ku fipeligwa ifi akaja jo Kyala, akajiilo ako kikunkalasya fiijo Kyala. 4 Abandu aba bakammanya Kyala, liilino bikuswiga paapo mutikulongosania nabo ukubomba imbiibi, po bikubatuka umwe. 5 Looli abeene bikwisa kwijobela isya kwinokesya nkyeni mwa Kyala,

ujū iitendekiisye ukubalonga abandū boosa, abuumi na bafwe. ⁶ Fyobeene abandū aba baafwile, boope baalumbililiigwe iNdami iNunu, ukuti balongigwe imbombo syabo isya mu mbili, kangi bajege nū buumi kū maka agaa Mbepo Mwikemo nkyeni mwa Kyala.

⁷ Amasikū gaa kummaliikisyo gasegeliile, po leelo mujege maaso nū kwitiima, ukuti muje na maka agaa kwipuuta. ⁸ Akakulumba kulī syosa, mugananegē mbwanalooli, paapo linga muganeene fiijo, kukusigila ukubombanila ubutulānongwa.* ⁹ Mwiganegē ukubambilila abandū nnyumba syinu ni ndumbula joosa.

¹⁰ Kakuti mundū ikulondigwa ukukibombela kanunu ikikungilwa kyake, iki apeeliigwe ukubatūla abanine, bo umwimilili ungolofu ugwa ipyana lya Kyala ilya lūko lwingi. ¹¹ Gwesa ujū ali ni kikungilwa ikya kujoba, ajobege mbwanalooli bwa Kyala. Ujū ali ni kikungilwa kya butūli, abatūlege abanine kū maka aga Kyala ampeele. Kū njila iji, Kyala atuufigwege ndi syosa kunongwa jaa Jesu Kilisiti, ujū ali nū busisya nū bulagili ubwa bwila na bwila. Ameni.

Ukukubilwa kunongwa jaa kunkonga Kilisiti

¹² Bakundwe, mulingaswigaga ukukaba ingubilo isi sikookya bo ulwa mooto unkali, ukuti mugeligwe. Isi silingajaga heesya. ¹³ Looli muhobokeye mbulilanisi bwa ngubilo sya Kilisiti, ukuti mukaje nū lusekelo fiijo iisikū lila, bo ubusisya bwa Kilisiti bukusetuligwa pabwelu.

* **4:8** 4:8 Bala kalata gwa Isya Mbupingamu 10:12.

14 Linga bikubatuka paapo mukujisubila ingamu jaa Kilisiti, musyaganiege ukuti mukusajigwa, paapo kokuti Mbepo uNsisya ugwa Kyala ali pamopeene na nuumwe. 15 Linga mukukubilwa, mulingakubilwaga kunongwa jaa kugoga, ukwiba, ukubomba imbiibi, pamo ukwingilila inongwa isya bandu abangi. 16 Looli linga mukukubilwa kunongwa jaa kaja Bakilisiti, isoni silingabakolaga looli muntuufyege Kyala, paapo mukujipimba ingamu jilajila ijaa Jesu. 17 Akabalilo kaa kulongigwa kafikile, Kyala ikutala ukubalanga abandu baake. Po linga ikutalapo ukutalanga uswe twe bandu baake jujo, bule, aba batikujitika iNdami iNunu ijaa Kyala, ukulongigwa kwabo aakutikwisa kaja kwa kutilisya fiijo? 18 Bo ulu Kalata uMwikemo ikuti,

“Linga abagolofu aabikupokigwa ku batolwe, sikwisa kaja buleebule ku batulanongwa aba bakampanya Kyala?”†

19 Po leelo, abandu aba bikukubilwa paapo Kyala aasibaatiike bo ulu, bendelelege ukubomba inunu nu kwibiika mmaboko gaa Kyala, uMmeli gwabo unsubiligwa.

5

Ukukitiima ikipanga kya Kyala

1 Lilino ngubakasya, umwe mwe bakulu baa kipanga kya Kyala. Une ne nkulu mwiniinu gwa kipanga kya Kyala. Ndi nkeeti gwa ngubilo sya Jesu Kilisiti. Kangi ngusubila

† 4:18 4:18 Bala kalata gwa Isya Mbupingamu 11:31.

ukwambilila ubusisya pamopeene nagwe, pakabalilo aka aabukusetuligwa. ² Po leelo ngubapyelesya umwe, ukuti mujege batiimi banunu baa kipanga kya Kyala, iki abapeele. Kangi mukitiimege ni ndumbula ijaa lusekelo bo muno Kyala ikulondela. Mulingafimbilisigwaga. Mulingabombaga imbombo jiinu kanongwa jaa kukabilamo itolo indalama, looli mubombege ku maka ni ndumbula jaa lusekelo. ³ Mulingajaga bakali ku bandu aba mukubalongosya, looli akajiilo kiinu kajege kaa kukeetelamo abeene. ⁴ Linga mukubomba bo ulu, akabalilo aka untiimi unkulumba ikwisa kuboneka, mukwisa kwambilila ingiga jaa buumi bwa bwila na bwila, iji jitikoonangika.

⁵ Nuumwe mwe balumyana, mwijiisyege ku bakulu baa kipanga kya Kyala. Umwe mwesa mujege booloolo fiijo bo muli pakutulana, paapo Kalata umwikemo ikuti, "Kyala ikubakaana abaa matingo, looli abaa lwijiisyo ikubapapo iliipyana."*

⁶ Po leelo mujege booloolo, mwijiisyege pa bulagili ubwa Kyala, ukuti joope abiinule pakabalilo kaake. ⁷ Munndekelege Kyala ubutolwe bwinu boosa, paapo umwene ikubupaasya ubutolwe bwinu. ⁸ Lembuka! Mujege maaso fiijo akabalilo koosa. Undugu gwinu Seetano ikulonda umundu gwa kansofya, bo ulwa ngalamu iji jikubuna, jikunyatukila umundu ukuti jinndye. ⁹ Mujege na maka ndwitiko nu kumpinga Seetano, paapo mumeenye ukuti

* 5:5 5:5 Bala kalata gwa Isya Mbupingamu 3:34.

abiitiki biiniinu mfiisu fyosa bikutaamigwa bo ulwino. ¹⁰ Po bo mukubiilwe kukabalilo, Kyala ugwa ipyana lyosa, ujū aabakooliile ukujamo mbusisya bwake pamopeene na Kilisiti bwila na bwila, umwene aikubatendekesya, aikubakasya, aikubapa amaka, kangi aikubabiika pa lwalo ulwa maka. ¹¹ Kumyake kujege nu bukulamba bwila na bwila! Ameni.

Uluponio ulwa kumalikisya

¹² Sila, umwitiki mwiniitu, amundu angolofu bo muno une ngummbonela, jo ujū anduulile ukusimba kalata ujū umpimba. Ngulonda ukubakasya nu kubasisimikisya, ukuti indumi iji nalooli lyo ipyana lya Kyala. Mwimege kanunu mwi ipyana ilyo. ¹³ Ikipanga kya Kyala iki kilimo mu Babeli,† aba basunguliigwe na Kyala, bikubaponia. Kangi umwanangu ndwitiko, ujū ingamu jaake jo Maalika, ikubaponia.

¹⁴ Muponaniege mwesa nu lugano, bo muno mukuponania na bakamu biinu.

Ulutengaano lujege na nuumwe mwesa mwe muli mwa Kilisiti.

† **5:13** 5:13 Mu Babeli Kokuti Mu Looma. Babeli jaali ngamu iji baajibombelaga ukubujoba ubunyafyale ububiibi.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8